

DI TRES ANOCHI "FESTIVAL HIMNO Y BANDERA HUBENIL"

Awe ta cera cu e comentarionan tocante di tres anochi di "Festival un canto na nos Himno y Bandera", categoria hubenil di 13 pa 17 aña di edad, cual a tuma lugar na Centro di Bario Tanki Leendert.

E anochi aki tabata mes placentero cu e anochi anterior, dirigi pa maestra di ceremonia **Sandra Croes** cu a haci un trabao formidable e dos anochinan.

El a presenta e hobennan na un manera masha

agradable y cu elegancia riba escenario, y cada un por a ricibi na final di nan cancion, palabranan di sosten y estimulacion pa sigui cu nan canto. For di comienzo te final, **Sandra** a tene e publico ocupa na un manera masha placentero y e comentarionan na final tambe tabata hopi tocante e presentacionnan di e maestra di ceremonia.

E anochi a cuminsa cu **Milanchely Richardson** cu **Tipico Alegre Kadushi Largo** cu e wals "Mi pais", y por menciona cu nerviosismo a pone cu e no por a domina tono na varios ocasion pero a recupera bunita.

Cu **Reflexion Band** a habri **Franksjen Vos** seguidamente. E hobencita aki cu ultimo 3 aña a demostra di ta subi y subi, a duna un presentacion di kita sombre cu "mi sentimento Arubiano" y for di e momento ey tabata candidata fuerte pa bira ganador. **Franksjen**

sinembargo a termina na di dos lugar cu su wals.

Cu e mes banda a presenta **Kenduard Henriquez** cu e wals "Mi Soño". **Kenduard** tabata riba bon caminda pero na dado momento a sali for di tono locual a perhudike sigur cu e huradonan cu e no a logra suficiente pa cay den premiacion.

Fuerte tabata **Darwin Gomez** cu **Reflexion Band** tambe, cantando "Mi compromiso ta cu mi Aruba". **Darwin** tabata candidato fuerte tambe pa premiacion cu voz bunita, bon dominio y bon articulacion, wantando su compas hopi, cu e cancion cu tabata tin letra netchi tambe. Segun mi tin entendi e tabata falta 6 punto mas pa por a cay den premiacion e anochi aki.

Kiziah Trimon cu su wals **Strea Cora** a sigui cu **Grupo Melodia**. **Kiziah** cu semper ta fuerte a duna un presentacion ganador un biaha mas. **Kiziah** a

bin termina na di tres lugar, pero no por keda sin menciona cu e musica tabata di volumen halto cu casi no por a scucha e coro y por poco a tapa voz di e cantante. Ta bon mes cu **Kiziah** tin un voz potente.

Liesjenka Croes cu su wals "Turcos bota" tambe a duna un presentacion fuerte e anochi aki cu **Tipico Macuarima**. El a haye cu un cancion dificil sinembargo a mantene su compas perfectamente acompaña pa un dushi sonido di tre. Su letra y melodia tambe tabata bunita sinembargo no a cay den premiacion.

Cu **Tipico Macuarima** a canta tambe **Nasheline Wester** cu wals "Aruba mi ta bo yiu privilegia". E tambe a mantene compas bunita riba e acompañamento di e tre, tabata tin bon voz y articulacion masha bon mes. **Nasheline** no a logra e puntunan necesario pa por a clasifica den e mihornan.

Fuerte tambe tabata e cancion "Ami" di **Miloushka Krozendijk** pero e afinacion a laga e cantante na caya. Cu poco mas dominio di su tononan, sigur e lo tabata candidato pa premiacion e anochi aki.

"Mensahe di un Chuchubi" tambe tabata un bunita cancion y **Ivienne Hernandez** a duna un presentacion hopi bon cu su bunita voz. Tabata un tumba cu un melodia hopi bunita y bon mantenimiento di e compas. **Ivienne** no a logra suficiente punto pa premiacion tampoco.

Micheline Abreu a habri su presentacion cu un mensahe a hobennan y mayornan basa entre otro riba respet y engrandece nos cultura y mayornan

Sigui Lesa pg: 24

.... Continuacion Pagina 23

pa stimula nos muchanan pa stima nos pais. Na tononan abao por a nota cu e voz tabata tin mester di afinacion y ademas e tabata corta tononan. Asina cu subi riba e tononan mas abao por a nota e buniteza di su voz. El a canta cu **Alma Folklorico** y ta cantante pa tene cuenta cune den futuro.

Cu **Tipico Poco Loco** a sigui **Lizamara Lacle**. E

cantante aki a sorprende e anochi aki cu su bunita voz, bon articulacion, cu melodia masha bunita di su wals "**un solo Aruba**" y no por a keda sin cay den premiacion. A bin resulta cu ta net **Lizamara** a bin gana e festival den su categoria cu composicion di **Casin Giel** y aregla pa **Danny Koolman** cu tabata riba keyboard tambe cu e agrupacion.

Eunice Albertsz cu "**Bo ta precioso**" tambe tabata candidata fuerte pa premiacion cu su cancion wals cu tabata tin un bunita comienzo. Masha bunita cu e voz precioso cu e tin un hopi bon articulacion, **Eunice** a pasa den su cancion. Finalmente a resulta cu e no a ricibi suficiente punto pa termina den e prome tresnan.

No por keda sin menciona e ambiente festivo cu tabata tin 3 anochi na Centro di Bario Tanki Leendert y cu hoi hende cu a bin e festival pa prome biaha a keda encanta cune, E ambiente familiar y cu cada cantante ricibiendo nan aplausonan di tur hende y e feria cu tabata un placer pa bishita cu e cantidad di pasabocanan tipico, platonan tipico di cuminda di cas, y pa no lubida e casuelanan "**made in Aruba**" masha popular di Henry Fingal. E mes

feria cu nos artesanonan y bendedornan ta locual ta haya tambe cu e concurso di e adultonan y aña pasa

aña ta birando mas bunita y hayando mas acogida tambe.

Juby Naar.